

«Jeu hai adina giu gronda fidonza el destin»

Avon 50 onns ei Corin Curschellas sepresentada per l'emprema ga live sin tribuna. Ladinamein ha ella mussau ses talents multi-fars sco cantautura, musicista, cumponista, actura e curatura. Ils emprems albums dalla cantautura cosmopolita ein daditg exausts. Ils 31 da mars cumpara perquei ina boxa cun quater discs cumpacts e dus cudischs – ina retrospectiva extraordinaria che dat in-vesta en sia lavur.



Ina foto che muossa Corin Curschellas il 1995 a New York. Ussa fa ella ina retrospectiva cun reedir quater discs.



Corin Curschellas mira anavos sin ina carriera musicala varionta ed impressiunonta e senta il desideri d'inventar enzatgei niev.

SUSI ROTHMUND/FMR

Corin Curschellas ha viu e viviu il svilp dalla musica cun registraziuns analogas e digitalas. Sii emprem solo-album ei dil 1992 e secloma «Music Loves Me». Avon ha ella oravontut cantau per e cun auters musicists sco *Walter Lietzba*, *Max Lüsser*, *Buno Spoerri* ni *Andreas Vollenweider*. Tochen ch'ella ei vegnida encurschada da sii contuorn da presentar atgnas canzuns: «All'entschatta da mia carriera musicala ei bia succediu plitost casual – sco miu destin ha vuliu. Jeu hai adina giu gronda fidonza el destin e da puder dar damogn a tut quei ch'il destin ha previu per mei. Sco caracter particular e rebellic havess jeu buca saviu sesvilupar en estructuras stretgas», declara Curschellas en discurs culla FMR. Sesend davos meisa ella sala biala dalla scola veglia a Rueun aschunta la cantautura ch'ella hagi adina giu plischer e gust d'empruvar il niev. Aschia seigi ella era vegnida avon 50 onns plitost casualmeins tiel teater. Corin Curschellas ha viu il mund, ha fatg viadis entuorn il globus ed ei stada da casa en gronds marcaus sin differents continents. Ella sala veglia – che Curschellas ha affittau dalla vischnaunca Ilanz/Glion – ha ella endrizzau silla tribuna siu «studio» da musica. «Cheu sin quella tribuna exerciteschel jeu persula e cun auters musicists e cheu hai jeu era gia registrau enzacons tocs», declara ella e raquenta dil café mardis che tschun dunnas da Rueun han clamau en veta. Ils mardis tili ella mingamai la tenda dalla tribuna e surlaschi la sala biala allas tschun dunnas. Allura semidi quei local mingamai en in café che attri dabia glieud.

«Jeu sentel in cert schar enrescher pil temps ch'jeu hai viviu ora il selvadi e giu la curascha d'alzar la vusch; per temas brisants e critics enviers la societad, per justia sociala, ecologia, diversitad e prendend posiziun per las dunnas.»

Corin Curschellas

Ina veta plein experientschas

«Il mund ei semidau aschi fetg, ton a Paris sco a Cuera, igl ei semplemeins buca pli il mund da mia giuventetgna. Paris ei semidau taluissa ch'jeu hai vuliu transferir miu mingadi a Rueun – c'est la vie», di la dunna che vegn era numnada «la grande dame» dalla musica romontscha. Ell'ei denton tuttavia ida cul temps ed ei aunc adina aviarta e marvegliusa pigl'ezcezziunale e special. Sco Curschellas sincerischa, arda il fiug per ulteriusas expeditziuns musicalas: «Jeu sentel in cert schar enrescher pil temps ch'jeu hai viviu ora il selvadi e giu la curascha d'alzar la vusch; per temas brisants e critics enviers la societad, per justia sociala, ecologia, diversitad e prendend posiziun per las dunnas.»

Relasch musical d'ina artista viventa

El futur vul la cantautura aunc ina ga inventar enzatgei tut niev: «Jeu gaudel il sentiment da buca propi aunc saver tgei che quei vegn ad es-ser...!» La boxa cun ils quater discs cumpacts ei ina retrospectiva da 1990 entochen 2010 cun in'elecziun dallas canzuns las pli impurtontas da quei temps. Sils discs ein denton era enzacons tocs novs da solo dilg onn 2022. Il tetel ei «Colleziuns: Her Songs 1990-2010+2022».

Sco Corin Curschellas raquenta en La Sala a Rueun ha sia amitga *Annette* dau gl'impuls da realisar quei project. «Ella leva tedlar mia musica ed jeu havess bugen regalau ad ella ils discs, mo ei deva negins pli da cumpar. Perquei hai jeu empristau ils mes culs plaid – quei ein ils davos ch'ei dat aunc, ein exausts. Sinaquei ha ella animau mei da reedir

silmeins ina schelta», aschia la cantautura ch'ei leda d'haver ademplier quei giavisch. Ins pudess era numnar la boxa in relasch musical d'ina artista viventa. Ils cudischs leutier cuntregnan differents texts e citats da Corin Curschellas e d'auters musicistas e musicists. Cun tut ils texts dallas canzuns e fotos eis ei propi ina boxa preziusa e speciala.

«Tener eri il temps»

Sco la dunna da 66 onns che habitescha oz principalmeins a Rueun di, duei la realisaziun dalla boxa er esser in omagi a tut ils ulterius musicists che han collaborau da 1990 – 2010 per las registraziuns. «Strusch da crer cun tgei musicistas e musicists da renum ch'jeu hai giu la schanza da luvrar» manegia ella. Sils discs ein massa nuns enconuschents da musicists dalla Svizra, Europa, Africa ed America d'anflar. Biars da quels enconuschli la giuventetgna strusch pli e quei seigi donn. Denton las 60 canzuns sils quater discs ein plinavon enzacons da sias argnas compositziuns, mo era ovras dil Vienna Art Orchestra ch'ei vegnidas cumponidas ils onns 90 aposta per la solista Corin Curschellas. D'anflar ein canzuns en dialect, romontsch, engles, franzos e tudestg ch'ei vegnidas registradas e producidas en differents studios dil Grischun, Turig, Berlin, Vienna, Paris e Londra entochen a New York. «Jeu less mo cuort tener eri il temps», conceda Corin Curschellas ed ei persuadida che quei gartegi il meglier cun in product ch'ins sa aunc tener enta maun. La boxa vesa ella sco manifest, buc il davos era per dar ina cunterpeisa haptica alla omnipresenza digitala.

Aschi ditg sco...

Era ils davos 15 onns ei Curschellas stada immens activa. Duront quei temps eis ella oravontut sededicada alla musica populara nova. Ella ha schau reviver canzuns quasi emblidadas ed ediu plirs discs e cudischs cullas canzuns. Quei en collaboraziun cun differents formaziuns sco ils *Fränzlis da Tschlin* ni era cun *Astrid Alexandre* ed *Ursina*. La musica da quei temps ei denton buca d'anflar ella buca damai ch'els discs ein aunc sin fiera. Corin Curschellas ei vegnida lunsch pil mund entuorn ed ha viu bia. Malgrad ch'ella sesenta dapi onns da casa a Rueun ha la cantautura salvau sia habitaziun a Paris nua ch'ella passenta adina puspei empau temps. La gievgia vargada ha ella tradiu: «Gest quels dis mon jeu a Paris per trenar cun mia band da pli baul per ina turnea.»

Ella cantautura arda pia aunc adina il fiug per ulteriusas expeditziuns musicalas e silla damonda sch'ella fussi argnamein buc pensinada ussa, manegia ella: «Ei quei aschia? Jeu sun adina stada independenta e quei vegnel jeu era a restar el futur. Negin sa pensunar mei. Aschi ditg sco ei fa plischer, aschi ditg sco la vusch, il tgerier, il destin ed il spert vulan – aschi ditg ch'ins vul tedlar mei, less jeu far musica... tut ei fetg aviart – era la fin. Jeu hai dedicau mia veta alla musica, agl art.»

La fin da mars cumpara «Colleziuns: Her Songs 1990-2010+2022» tier il Label Tourbo Music. La boxa cun ils quater discs cumpacts po vegnir empustada directamein tier Corin Curschellas via www.corin.ch. Leu vegnan era las datas dil concerts publicadas. Naven dil matg vegn Corin Curschellas ad ir sin turnea culs musicists Noël Akhoté, Benoit Delbecq, Steve Argüelles, Patricia Draeger e Lukas Traxel.

FLEM



A Vallocca Vul Flims Electric construir ina nova centrala per producir calira a distanza. Il suveran ha votau a favur dalla revisiun parziala necessaria per puder realisar quei project. FOTO AUGUSTIN BEELI

Il suveran da Flem ha detg duas gadas GIE

A Flem/Vallocca vul Flims Electric construir ina nova centrala per producir calira a distanza ed in niev liug da rimnada. Per saver realisar quels projects ston las zonas vegnir fixadas da niev ed era il plan general d'avertura el territori Vallocca sto vegnir adaptat. A caschun dalla votaziun ull'urna dad ier, ha il suveran detg, cun 93 %, in clar GIE a quellas revisiuns parzialas. L'antieriura deponia da rumien duei vegnir descargada completameins sco deponia veglia da rumien. La centrala nova duei furnir calira pils quaters Tull, Pleuncas, Caglims, Camaruts e Vallocca. Quei cun nezegiar la fontauna d'aua da carst el tunnel da sviamient Flem. Votantas e votans da Flem han plinavon decidu in revisiun parziala dalla planisaziun locala. 88 % da quellas e quels che han votau en cassa ein stai persunter. Cun quella midada duei l'entira parcella 4002 vegnir ella «zona da coc II» dalla vischnaunca Flem. Actualmeins scatta quella parcella en duas zonas da baghegiar. La vischnaunca haveva cumparu la parcella il 2012 explicitameins per construir spazi d'habitar pagabel per indigens. (cdm/rtr/fmr)

MEDEL/LUCMAGN



La sonda vargada ha ei dau ina collisiun frontala silla via dil Lucmagn. Igl accident ha caschunau duas persunas levblessadas. FOTO PODHA

Duas levblessadas

A Medel, silla via dil Lucmagn, hai dau la sonda vargada ina collisiun frontala da dus autos da persunas. Tenor in communicau dalla Polizia cantunala ein duas persunas vegnidas blessadas levameins. La sonda da mezdi, cuort avon las 11.00, carrava ina manischna da 27 onns ensem cun in passagier da 31 onns cun siu auto da persunas silla via dil Lucmagn a Medel. Vegnend da Mustér carravan ei en direziun dil pass Lucmagn. El medem mument carrava in'automobilista da 54 onns ensem cun sia cunautista da 52 onns naven dil pass en direziun Mustér. En ina storta dregga, ell'altezza da Platta, ei la dunna da 54 onns vegnida sil vial oppost nua ch'ella ei collidada frontal cugl'auto che vegneva encunter. Suenter ils emprems tractaments da medischina d'urgenza el liug, ein omisduas dunnas levblessadas che eran egl'auto che carrava enguivars vegnidas transportadas dil survesch da salvament Surselva el Spital regional Surselva a Glion. Ils motifs pigl' accident ein aunc buc enconuschents e la Polizia cantunala dil Grischun interquera minuziameins las circumstanzas che han menau a quei accident. (cdm/fmr)

FMR